

[561r] [*en marge*] Ecclesia parochialis Mocalis

Die 20 iunii 1686.

Idem dominus Pellegrinus Gervasius visitavit ecclesiam parochialem sub titulo sancti Thomae apostoli de loco Mocalis, non consecratam, liberae collationis, recognoscens pro matrice ecclesiam plebaniam nuncupatam sub titulo sanctae Restitutae de loco Calenzanae, eiusdem ecclesiae sancti Thomae est rector reverendus Iulius Galeatio de Calenzana, percipiens in annuo reddito libras centum quinquaginta.

Visitavit et in ea sanctissimum Eucharistiae sacramentum, quod servatur in pixide argentea intus deaurata, intra tabernaculum ligneum desuper auratum satis decens super altare maius, ante quod ardet continuo lampas sumptibus populi, adest umbella et lanterna pro deferendo sanctissimo viatico ad infirmos; mandavit sustentacula lignea eiusdem umbellae, quae sunt rupta, restaurari intra quatuor menses, sub poena arbitraria.

Visitavit fontem baptismalem in vase marmoreo cum ciborio ligneo, in quo conservantur sacra olea crismatis et cathecum[e]norum necnon infirmorum in vasculis stanneis decentibus. Ordinavit quod [561v] supra eundem fontem appendatur umbella et in pariete proximo imago sancti Ioannis Baptistae Christum baptizantis, et tabulae eiusdem ciborii melius compaginari adeo ut claudantur rimae per quas transeunt locustae, quibus abundat campus ubi sita est ecclesia, ne deinceps intrent per dictum ciborium et fontem, prout repertae sunt ab eodem domino visitatore.

Visitavit altare maius, quod fuit repertum satis decenter ornatum, manutenetur sumptibus populi, cuius homines, proponente domino rectore, faciunt impensas necessarias et opportunas.

Sacra suppellectilia custodiuntur in arca prope altare. Ordinavit calicem unicum, cuius cuppa est avulsa a pede, crysocolla stabiliri, et quod provideatur de planeta, stola et manipulo nigri coloris et de sex purificatoriis necnon de bursa violacei coloris pro custodiendo vasculo olei infirmorum, cum suis cordulis pro ea claudenda et etiam ut possit appendi collo sacerdotis, et etiam de bursa diversorum colorum pro custodiendis corporalibus, quae omnia adimpleri mandavit infra annum, sub poena arbitraria.

Sacrarium est prope altare maius a latere evangelii, quod mandavit altius elevari et sera [562r] et clave muniri intra tres menses, sub poena arbitraria.

Sedi confessionali ordinavit apponi bullam Caenae intra mensem, sub poena arbitraria.

Corpus ecclesiae est satis decens, prope tamen altare maius est depositum cadaver

reverendi Darii olim rectoris eiusdem ecclesiae, et quia dictum corpus non [est] humatum et loculum occupat praesbiterium, ad tollenda huiusmodi inconvenientia ordinavit praedictum cadaver intra octo dies sepeliri in sepulcro ibidem proximo et in loco ubi erat depositum construi podiolum ad formam illius quod est proximum, intra sex menses, sub poena arbitraria; et si domini eiusdem sepulcri in hoc non consenserint, quod non credit, tali casu rumpatur pavimentum ecclesiae et ossa praedicta humentur, quod mandavit adimpleri per reverendum rectorem intra eundem terminum.

Caemeterium est ad formam.

Visitavit altare sub titulo sancti Antonii abbatis, fundatum et erectum sumptibus communitatis dicti loci, manutenetur a confratribus societatis sub titulo sanctae Crucis ad illud erectae, ad quam confluunt contributiones confratrum, quae administrantur per novum massarium, qui quot annis renovatur et in fine officii reddit computa [562v] coram reverendo rectore et novis et veteribus officialibus, eiusdem confratres singulis diebus festis congregantur ad recitandum officium beatae Mariae virginis, processiones et funera comitantur ad praescriptum capitulorum ab episcopo approbatorum.

Sunt multi debitores eiusdem societatis, tum ex confratribus qui suam quotam contribuere tenentur, tum ex massariis qui sunt obligati ratione reliquatus suorum respective computorum, et omnes huiusmodi debitores, prout fuit dictum, negligunt solvere sua debita; propterea ordinavit quod praesentes officiales faciant inventarium et listam nominum debitorum intra tres menses, sub poena interdicti ab ingressu ecclesiae ipso facto incurrenda, qui debitores deinde moneantur per reverendum rectorem ad solvendum quicquid quisque tenetur eidem societati intra sex menses, sub eadem poena ab ingressu ecclesiae eo ipso incurrenda.

Ordinavit quod supra praedictum altare ponatur umbella longior et latior et melius elaborata, quod provideatur de lapide sacro et de quatuor candelabris ex auricalco et cruce simul cum suo pede eiusdem materiae et de tribus tobaleis decentibus, et quod circa iconam ponatur aliquod ornamentum saltem ligneum [563r] cum sua celatura desuper aurata et picta decenter, et quod provideatur de tabellis secretorum et ultimi evangelii, quae omnia adimpleri mandavit intra annum, sub poena interdicti eiusdem altaris.

Vidit liber parochiales, et circa partitas baptizatorum ordinavit quod imposterum scribantur ad formam ritualis romani et addantur nomina eorum qui sacramentum baptismi in casu

necessitatis, ut dicitur, administraverunt, et ad hunc effectum per reverendum rectorem fiat diligentiam ad hoc investigandum.

Item declaravit non esse articulum necessitatis, propter quod liceat deferre sacras ceremonias et interim private et domi baptizare pueros, eo quod patrini aliunde et a partibus longinquis sint habendi, et propterea ordinavit quod propter hoc huiusmodi baptismum private non esse administrandum, et qui alias attentare praesumpserit, minister nec non parentes qui fecerint huiusmodi instantias, sint ipso facto interdicti ab ingressu ecclesiae. Item ordinavit quod partitae matrimoniorum, quae ita sunt confuse adnotatae, sine constructione, ut vix possit intelligi quid importent, scribantur imposterum clare et ad formam ritualis romani, sub poena (etc.).

Desiderantur partitae status animarum, piorum legatorum et inventarium bonorum et iurium eiusdem ecclesiae, [563v] et propterea ordinavit confici intra sex menses, sub poena suspensionis a divinis a reverendo rectore incurrenda.

Animae in totum sunt 156, ex quibus communicantur centumduodecim, non tenetur nota eorum qui satisfecerunt praecepto, propterea ignoratur an omnes adimpleverint, circa quod inconveniens observetur decretum generale. Incestuosi sunt Santes quondam Ghilfucii et Angelicam quondam Pauli ambo de Mocale. Non habetur notitia aliquorum piorum legatorum eo quod notarii non dant copiam debitorum, propterea provideatur per decretum generale.

Functiones parochiales exercentur, doctrinam christianam pueri docentur, et exhortationes ad populum habentur pro captu eiusdem parochi. Vidit bullas consequutionis dictae ecclesiae expeditas et subscriptas ab illustrissimo et reverendissimo domino domino Antonio Martini episcopo Sagonensi sub datum Calvi die 28 iunii 1681.

[*en marge*] Oratorium sancti Rocchi

Die ea.

Visitavit oratorium sub titulo sancti Rocchi situm in villa Mocalis intra limites parochialis ecclesiae dicti loci, fundatum et erectum sumptibus et devotione populi Mocalis a quo etiam manutinetur, nullos habet certos redditus nec onera, unicum est in eo erectum altare, quod fuit repertum competenter ornatum et provisum omnibus necessariis ad sacrificium missae, prop[564r]terea nihil ordinavit.

Corpus praedicti oratorii est satis capax quod possit recipere populum dicti loci et etiam satis decens, propterea ordinavit a parte interiori dealbari et melius puliri intra annum, sub poena arbitraria.